

欽定剿平粵匪方略

欽定勦平粵匪方略卷二百十二 己未年

九年正月初五日

丙子

德興阿奏言查該逆占踞

六合後各隘安設賊卡不時出擾自官軍紮營

緊逼匪蹤稍斂臣營移紮猴子鋪上月二十四

日派令馬步全隊分路進勦鞠殿華等由南路

進成明等由北路進臣親督富明阿副將馬德

昭等由中路雙橋前進另派副將魁霖等率領

各隊分段埋伏富明阿馬德昭等馳過冶浦橋
東關賊壘出賊數百人拒敵我軍開礮轟擊斃
賊多名餘悉奔回城內當將賊壘焚燬正在跟
追南北兩門出賊四五百人分股衝突英貴詹
啟綸各帶兵勇迎擊博奇常壽各帝馬隊包抄
臣復派穆克登額策應該逆合趨東門意欲將
中路各軍兜裹富明阿馬德昭奮力抵敵且戰

且退誘賊行過冶浦橋雙橋伏兵同時並起該
逆紛紛敗遁又經馬隊橫衝斜擊該逆拌命過
河各軍截殺斃賊約四五百名落水淹斃者不
計其數生擒長髮悍賊十八名砍獲首級三十
七顆立將三面賊壘一律踏平河東逆卡望樓
並行燒燬訊據生擒逆匪供稱六合賊首僞前
軍巡討黃門汝等聞大軍紮營緊逼已飛信金

陵求添賊黨等語臣查賊占六合縣城惟嚴防東路北路南門濱臨大河該逆踞以爲險臣思督率全軍搶搭浮橋立攻南門或易措手如能截斷南路外援則城中賊勢尤孤刻下六合附城百姓漸已歸來現飭署江浦縣知縣陶金貽會同署六合縣知縣張肄孟辦理團練藉助兵力再行移營進紮以圖攻取

德興阿又奏言十二月十三日賊竄黃廠河經水師開礮擊退總兵陳世忠撥兵策應行至四壩頭地方適遇匪衆回竄該處鄉團協勦擒斬賊匪多名十九日賊匪又至新莊口等處擄掠陳世忠派兵掩捕該逆始則回拒繼則狂奔我兵分路兜剿殲殺殆盡內有僞總制一名查逆情詭譎沿江要口亟宜堵扼六合滑子口與南

岸石埠橋緊對誠恐奸宄偷越已飭知縣陶金
貽嚴密巡查惟據總兵陳國泰稟稱浦口師船
尙嫌單薄請再派撥下游數船赴浦臣卽飭駐
守瓜州之總兵周希濂率帶全幫艇船上駛撥
船四隻派赴浦口餘則分撥泗源溝並令周希
濂親帶各艇駐泊東溝其原防東溝石埠橋之
參將李新明所帶師船卽令駛泊段要口聽調

又南岸留防之勇昨已撥還一千二百餘名渡江餘與副將馬德昭等原帶之兵一千二百名仍留北岸助勦奏入均報

初七日 戊寅 和春奏言提督鄭魁士馳抵甯郡時

西河紅楊樹之賊日在郡城附近之寒亭一帶往來窺伺統計援師暨招集潰勇已不下三萬

人惟新挫之後其氣未復鄭魁士一面申明軍律逐日操演一面派撥道員仲孫懋遊擊楊國正帶兵五千分紮寒亭團山地方仍令副將龍正耀等各軍由廟埠油榨溝等處步步爲營直抵水陽鄭魁士卽統帶親軍移紮梅嶺居中調度其南陵青弋江股匪於十二月初五日竄入涇邑幸張芾豫調周天受一軍已抵甯郡當與

鄭魁士會商令副將米興朝帶隊馳援並飭遊擊馮日坤等會督紳民相機規復周天受親率大軍兼程而進初六日我師四面攻圍該逆奔潰立將涇邑城池收復仍派兵留守以防回竄至南陵被圍日久東西北三面賊營聯屬另股盤踞麒麟橋到處焚掠並欲糾合匪徒自北而南斷我餉道參將吳再升等於初七初十等日

分投迎勦，踢毀逆卡二道，殲匪數百人。十六日，米興朝由涇邑進勦，又敗賊於陳橋、峨嶺等處。乘勝移紮五里岡。周天受親統官兵駐紮雙坑，與鄭魁士聯絡南陵東路之賊。經參將吳再升等督率兵團屢戰皆捷。周天受又派兵從寒亭圍山兩路擊賊之背。該逆遂於十七十八日夜間遁往西北一帶。南陵東面城圍已解。臣查皖

南形勢實江浙兩省要害而甯國尤皖南第一
重鎮故各路寇氛皆由皖南窺伺蘇杭臣揆度
事機總宜厚集兵力緊扼中權自徽池以迄甯
太以次埽蕩廓清沿江列戍不獨蘇浙邊鄙無
虞從此會勦金陵辦理亦較有把握鄭魁士深
明全局於一切攻守機宜有條不紊大旨在練
兵教戰先爲不可勝以待可勝更得周天受協

同布置尤於皖南軍務大有裨益惟查金陵首
逆自皖南肆志以後匿不出巢探聞洪賊又復
號召上游死黨陸續調回城中臣已申儆各營
嚴爲之備並由張國樑親駐安德門督飭將士
扼守濠牆以免乘虛外竄至高淳東壩溧水一
帶情形屢據總兵周天培張玉良等稟報一律
照舊嚴防互相策應仍不敢稍存大意奏入報

初八日卯己浙江提督鄭魁士奏言臣前奉和春

檄飭馳往甯國接辦防務當卽冒雨起程於十

一月三十日行抵甯郡知退至甯國兵勇二萬

有奇經鄧瀛米興朝等派在城外紮營二十餘

座並分派防守郡城親歷各營查勘均地居扼

要布置尙屬嚴密惟軍械鍋帳大半遺失並有

散居村莊者而城內兵勇因無軍器亦居民房
火藥鉛丸查俱不滿千斤卽飭各帶兵官押令
歸營復逐一查覈將尙有軍械者仍留助勦其
軍器全失者遣回江南大營一面飛咨浙省迅
卽籌撥解運以資急需至蘇浙兩省提撥軍械
藥丸節經飛催未見續解到營兵勇餉銀久缺
甚鉅當潰退後衣履盡失歲暮嚴寒困苦益甚

臣目擊情形萬分焦急伏思甯國一郡爲浙江
第一緊要門戶兼之山徑叢雜道路紛歧堵禦
必應慎密全在餉糈充足方能固結軍心現在
甯郡所屬六縣皆有賊蹤得候補三品京堂張
芾不分畛域酌濟軍火並令提督周天受帶兵
一千餘名由婺源來甯適值涇縣失陷經臣與
之面商添派兵勇二千餘名交其帶往並令米

興朝等隨同助剿斃賊多名於初六日將涇縣克復南陵被賊攻撲雖我軍連獲勝仗而重圍未解青弋江踞賊雖經擊退西河一帶尚有賊匪屯集灣沚黃池仍爲賊踞昨接周天受來函督軍紮營青弋江派遊擊馮日坤一軍由馬頭夾岸爲營以圖會攻西河鎮臣卽派遊擊冉正祥等紮營寒亭候補道仲孫懋等紮營團山副

將龍正耀紮營油榨溝總兵蕭知音扼紮新河
莊臣擬卽帶領存城兵勇紮營梅嶺居中調度
相機進攻當茲挫失之後亟應激勵士卒重整
軍威以冀迅圖規復庶援兵不致久羈卽餉項
亦可舒展無如軍械不齊藥丸餉銀尤爲短缺
臣接辦伊始掣肘如斯事關重大不得不據實
瀝陳合無仰懇

天恩俯念皖南軍務緊要浙江門戶攸關

飭令浙江撫臣趕緊運送軍械補給餉需源源接濟勿再延誤以全大局奏入

上命軍機大臣傳諭何桂清胡興仁曰甯國軍營自潰挫以後器械鍋帳大半遺失現雖經鄭魁士收集潰散與新到各軍分別布置而徒手未能禦侮枵腹尤難荷戈情形萬分危迫該郡爲浙省門戶著胡興仁

遵照前旨將應撥餉需按月如數撥解不得以籌措艱難稍涉遲誤至所需軍火等件並著該撫源源接濟所有由金陵調援甯國各軍及水陽防勦兵勇一十二兩月分應發之餉統由江南糧臺借給其正月以後餉需仍由浙江支應惟甯防需餉迫切仍著何桂清不分畛域悉心籌畫極力兼顧以保東南大局

十一日壬午耆齡奏言查福建大股逆匪竄陷瑞

金知縣章澍都司清平自退紮九堡後派弁添募勁勇千餘名並原有兵勇九百餘名會同巡檢張慶譽典史連封調集鄉勇於十月二十五二十八十一月初一等日疊次進剿殲賊一二

百名至三四百名不等初三日章澍清平各率兵勇兩路進攻縣城行至離城十餘里賊蠶擁

來拒章樹等揮兵大進愈戰愈奮斃賊一千餘
人焚燬賊營三十餘座賊敗棄城逃竄章樹等
率師入城搜斬餘匪數十人追殺數十人落河
淹斃者不下千人餘匪悉由會昌遁去當將瑞
金縣城收復至安遠縣城被賊兩次轟塌城牆
均經搶築完固署知縣張仁法督同營官黃順
率領弁勇於城內挖梅花坑數處防賊隧道十

一月初十日大南門城牆又被地雷轟陷正在
堵截間小南門又被轟塌兵勇開放大礮斃賊
數十人賊仍冒煙而上我兵齊施火器斃賊數
百人賊始卻走遂卽槍築堵塞該逆復於城之
東南隅開挖地道二處均經張仁法督飭弁兵
由城內挖透殲斃隧中數賊該逆復造呂公車
來攻守塚士卒施放大礮擊斃賊匪十餘人二

十一日夜張仁法料賊苦攻經月勢已疲倦令黃順潛師出襲放火焚營賊倉卒接仗被斬四百餘級逆鋒大挫於二十二日棄營遁去城圍遂解其分擾贛縣長甯邊界者均爲各該縣兵勇擊走其信豐縣圍城之賊經總兵遮克敦布等派兵擊勦於前坑地方及丫叉橋吳家嶺等處均有斬擒逆匪分股由楊柳坑竄入大庾縣

境知府周汝筠調勇往勦行抵新城墟將賊擊退該逆又分股竄撲南安府城十一月二十四日攻陷南岸民城文武各員堅守北岸官城周汝筠當將援應信豐之勇調回二千名二十五日趕至大庾邊界賊匪兩次竄撲新城墟均爲我軍擊敗二十六日賊又犯新城墟我軍出戰新城團勇先敗南康勇亦不支退回康邑邊界

周汝筠復添調團勇馳往堵剿南安被圍緊急
南康勇旣被新城股匪隔絕不能前進崇義縣
派出赴援團勇亦以賊衆兵單未能衝入三十
日該逆用地雷轟塌城牆以致郡城被陷文武
各官不知下落臣查瑞金甫經克復南安旋又
告陷安遠賊雖擊退信豐尙未解圍亟應催集
兵勇攻剿現經飭令周汝筠多集練勇上猶崇

義二縣亦各率團練以勦爲堵合力進攻南安
一面咨會曾國藩飭催蕭啟江兼程赴贛與遮
克敦布兵勇併力勦洗速解信豐之圍會勦南
安迅克郡城其克復瑞金及安遠守城出力人
員容俟查明請獎擬保教諭生員張映薇中礮
殞命相應請

旨飭部照教諭例議卹以慰忠魂奏入

上諭內閣曰福建大股逆匪竄陷瑞金並圍安遠信豐等縣城經署瑞金縣知縣章澍等調集團勇於十一月初三等日進攻當將瑞金城收復其安遠縣城於十一月初十等日被賊轟塌城牆多次均經署知縣張仁法督勇搶築竭力擊退城圍遂解其信豐縣圍城之賊我軍擊勦於前坑及丫叉橋等地方均有斬擒該逆復分股竄撲南安府城周汝筠飛調各團

勇援應均以賊衆兵單未能衝入致郡城於十一月三十日被陷著耆齡嚴飭各軍併力勦洗速解信豐城圍並將南安府城迅速克復所有克復瑞金及安遠守城出力人員著准其查明奏請獎敘其守城中礮殞命之擬保教諭生員張映薇著照教諭例議卹

二十三日
甲午德興阿奏言六合踞逆添調匪黨

五千餘人分紮東南各門上年除夕逆衆出巢

襲我營盤當經擊退正月初二日賊分三路來
撲沿途縱火層啟輪派令兵勇迎向火光起處
分路兜擊環開槍礮該逆望風披靡紛紛敗遁
其分股竄撲新黃巷之賊亦經英貴等伏兵兜
剿轟斃殺斃甚多初四日臣傳齊全隊與鞠殿
華親督進攻諸軍直抵城下開礮轟擊該逆堅
匿不出惟在城上開礮相拒正撤隊間東門出

賊二三千名直撲雙橋我軍列隊橋東誘之使
前該逆堅不過橋馬德昭詹啟綸等各率兵勇
向前迎擊該逆拌命回奔自相踐踏爭入城闔
官軍追至城下連開槍礮轟倒城上望樓擊斃
執旗賊目數名始行收隊初九日臣飭令各營
出七成隊伍列陣前進六合之賊已出六七千
人蠶擁來偏雙橋臣等揮令諸軍分投迎擊槍

礮齊施中隊佯退誘賊左右隊併力包抄富明
阿等復帶馬隊橫衝斜擊賊衆潰亂紛紛敗竄
詹啟綸帶隊追擊殲殺甚多我軍追至冶浦橋
六合東門復出賊數千人將敗賊接入城內續
出之賊排列河邊開放槍礮子落如雨我軍未
能渡河漸次收隊是日約斃賊三四百名據水
師總兵陳國泰稟稱上年十二月二十四日分

派各船進攻九汊洲賊壘偏近賊巢拋擲火罐
火箭焚燬瞭樓一處該逆開礮拒敵適東南風
大作火勢愈張連燒數壘各軍於火光中施放
鳥槍斃賊無數正欲設法搶渡濠溝忽報下關
賊匪駕船來援官軍恐有疏虞收隊回泊臣查
該逆負嵎踞守此番水陸進剿雖未復城奪壘
亦足以褫逆魄現在六合接壤滁來之路皆經

聞

勝保布置兵勇防守德安兵勇前由臣派防天
長現在勝保調防天長南路東嶽廟如能聯絡
周密可杜逆衆旁竄奏入報

二十四日乙未勝保翁同書奏言接據參將李世

忠稟稱欲平粵逆惟在先斷私礮次及米糧方
可制賊死命並指出大江南北水陸口岸要隘

各處奸商通匪偷販請嚴斷往來絕其接濟詳
閱稟詞不爲無見但袤延數省地方遼闊隘口
過多且私礦關繫尤重盤查口岸固屬緊要而
於各省會及著名鎮市商賈輻輳屯積之所盤
察更宜加嚴非有督師大臣及地方督撫知照
不准採買其經過關津隘卡亦非有印文護票
不准私行放走應請

旨飭下各路統兵大臣及各省督撫嚴定章程實力盤
禁以杜偷販接濟奏入

上命軍機大臣傳諭各路統兵大臣直隸山東山西河
南陝西江蘇安徽浙江江西福建湖南湖北四川各
督撫曰勝保翁同書奏請飭嚴禁偷販私礦等語據
稱參將李世忠詳稟逆匪橫行皆由私礦接濟並指
出大江南北水陸口岸各要隘奸商通匪偷販各情

亟應嚴行查禁以杜私售惟現在用兵地方袤延數
省隘口過多私礦販運斷絕匪易其各省會及著名
鎮市商賈輻輳之所尤應詳加盤詰除山西等處產
礦之地嚴禁私礦出售外其各路軍營及用兵省分
非有統兵大臣及該督撫委員解送印文知照者概
不准擅行採買其經過關津隘卡如無印文護票者
卽著查拏懲辦儻有不肖官吏私行賄放者察出嚴

行治罪軍營兵勇如有偷漏硝磺火藥接濟賊營者
卽以軍法從事著官文德興阿和春勝保曾國藩張
芾傅振邦等及各直省督撫嚴定章程實力盤禁毋
稍鬆懈並著和春何桂清等嚴飭地方員弁於東壩
一帶曉諭商民不准在太平關等處販賣貨物使該
逆無從接濟米糧以冀制賊死命

勝保翁同書又奏言查粵賊盤踞廬郡分屯店

埠梁園時及半載臣等疊經嚴飭在防鎮將由
護城節節進逼堵剿兼施該逆偵知官軍勢盛
梁園賊遂南退以全力踞守店埠爲廬城犄角
仍糾合潛太賊衆於油坊集一帶焚掠聲言攻
撲護城營盤圖犯定遠臣等以該逆旣思北逞
不如添兵迎剿先發制人因飭總兵吉順等督
率各軍徑攻店埠並令知縣英翰主事黃先瑜

速集團丁隨同進剿復由定遠大營添派副都
統烏爾滾布協領富明阿帶領精壯馬隊先期
馳往爲各軍策應以便分路進攻本月十一日
各軍同時並舉距店埠三里許地方遙見該匪
數千人伏巢以待我軍先令步隊三四百名前
往誘戰逆衆來迎我軍槍礮齊發各路一擁而
進該逆分股迎撲衆軍勇氣百倍直前奮擊富

明阿率領馬隊抄襲賊後合力夾攻逆衆紛紛
回遁突有騎馬黃衣賊目擁衆回拒我軍愈加
奮勇立將賊目陣斃逆衆狂奔我兵緊躡追擊
一氣趕殺斃匪不計其數追至賊壘外濠擁擠
落水者甚多其未及過濠者悉被我軍刺殺無
餘正在催隊環攻忽西南復來賊衆千餘意圖
援應富明阿等會合馬步疾馳迎勦該逆抵敵

不住翻身向竄我軍奮猛追殺兩次約斃匪五六百名餘賊退竄入巢抵死踞守我軍整隊回營查全皖境內之賊幾於防不勝防剿不勝剿臣等設法抽撥官軍相度緩急四路兼顧軍威得以漸振但必須後路匪勢稍鬆方可專力專賊亦必須餉需稍裕庶能堵剿兼籌奏入報

同日張芾奏言池州府屬濱臨太江北距安慶
西達江西迤東北而蕪湖以至金陵各路敗匪
總匯於斯誠非勦撫兼施不足以清羣孽上年
四月間有石達開餘黨僞檢點張汰忠率衆自
浙江開化竄婺源窺祁門均被官軍團勇擊卻
五月率黨至池屬建德縣之葛公鎮葛源地方
分紮未及一月欲往楚軍水營受撫適建德士

民汪森等知其悔罪乘機勸諭代爲呈繳僞印等件又據池州府通判袁慶恩稟報相同臣卽飭鳳陽府知府楊沂孫署池州府知府皇甫漢仕會同妥辦復經署皖南鎮總兵江長貴委弁馳往與知縣沈昌祚等親至張汰忠營體察情形並令貴池生員陳鈺宣諭張汰忠如能擊破賊卡收復縣城卽准免罪張汰忠遂率衆薙髮

於六月間連破建德城外各賊卡並克復建德
縣城據皇甫漢仕等取具張汰忠供結稱係湖
北黃陂縣民向在漢口打鐵營生爲賊所擄偪
授僞職據情乞恩等語臣以張汰忠旣能殺賊
立功自應奏請免罪錄用以示威信惟查建德
爲兩省要害久陷賊中雖經收復尙恐其旋得
旋失且張汰忠自拔來歸卽能洗心革面安見

其衆志悉堅因飭皇甫漢仕等挑留張汰忠降
衆精壯四百餘名餘悉遣散仍令駐紮葛源聽
候調遣以徐覘其誠僞乃自張汰忠歸誠後卽
有曾爲僞官之李濟元張連芳朱第枝等觀感
而興率衆反正數月以來安慶鄱陽之賊糾合
殷家匯等處匪黨屢次進犯冀甘心於建德經
張汰忠會約李濟元等揮衆奮擊所向披靡一

敗賊於赤頭嶺再敗賊於洋湖陂俘斬擒獲難以數計卒以保全建邑臣查張汰忠等悔罪投誠所向有功合無仰懇

天恩俯准將張汰忠以千總補用並

賞戴藍翎其李濟元等擬先予免罪俟續有勞績再請加恩以示區別至籌辦受降撫馭妥協之鳳陽府知府楊沂孫等暨其餘在事出力官紳亦未便沒其

微勞可否擇尤酌保以資鼓勵之處均出

逾格鴻施奏八

上諭內閣曰湖北黃陂縣民張沐忠爲賊所擄偏授僞職上年五月閒率衆來歸攻復建德縣城半年以來屢著功績並有李濟元張連芳朱第枝等觀感而興投誠歸正安慶鄱陽之賊攻撲建德均被擊退斬俘不計其數實屬異常出力張泰忠著加恩以守備補

用並賞戴花翎李濟元張連芳朱第枝並著以把總
拔補俟續有勞績再行保奏以爲自拔立功者勸其
餘在事出力官紳並准其擇尤酌保以示鼓勵

張芾又奏言青陽之賊竄聚楊田埂進撲涇縣
之萬級嶺遊擊吳正熙屢次迎戰復經提督周
天受由青弋江帶隊回涇親駐下坊遙爲策應
雖逆勢稍卻而兵力究未厚集崇覺寺及東沖

泥田等嶺山徑紛歧深虞內犯至婺源賊踞數
月總兵江長貴督率將士直薄城闕惟兵力單
薄祇能顧及東北其西南非有浙兵越境會勦
斷不能制其死命臣屢催衢州鎮總兵李定太
飭令副將李嘉萬移營前進乃駐軍新建距婺
城尙四十里致該逆恃有奸僧接濟敢於負隅
久抗現聞侍郎曾國藩派道員張運蘭等分統

聞

勁旅進攻景德鎮累戰輒捷儻敗匪窮無所歸
併入婺源則勦辦更難得手卽旁竄祁門建德
亦恐路雜兵單難籌堵禦臣已飛檄江長貴並
分飭地方文武及現駐婺源之張泰忠等各率
兵團一體嚴防以期有備無患奏入報

二十五日丙申胡興仁奏言查南陵踞賊經該處

防兵屢次痛勦仍復偪圍未退自提臣鄭魁士
總統甯國防兵按部整飭逐營操演一面派總
兵米興朝帶隊由南援勦復派遊擊冉正祥等
於上年十二月十七日帶勇扼紮寒亭進攻西
河並派甯紹台道仲孫懋等扼紮團山進攻紅
楊樹以爲南陵聲援並派副將龍正耀等從油
榨等處滾營而進該提督親督兵勇扼紮梅嶺

督飭進剿使灣黃之賊無暇趨併南陵該逆勢蹙果於十七八等日夜撤東路之圍遁去提督

臣周天受卽飭遊擊謝長禮等帶彪勇扼紮南陵之麒麟橋以通糧道又派遊擊榮陞等帶所部兵勇向青弋江進紮該署提督亦帶小隊並遊擊吳正熙等進紮青弋江築營十座與鄭魁士之軍互相援應二十二日大股賊匪由西河

南陵兩路來撲我營周天受令馮日坤等率領部卒迎戰西河股匪又派榮陞等迎戰南陵股匪我軍乘雨佯退南陵股匪紛紛進撲直逼隄埂勢欲先占高處周天受率參將馬光宗等伏於隄下登時突起槍礮連環擊斃甚多賊無退路沿隄橫竄欲與西河賊衆併股馮日坤率兵攔擊賊勢瓦解遁入竹林深處遊擊林保等以

槍礮直撲竹林各戰士分投追殺十餘里收隊
回營於時南陵西路之圍已解東北之賊亦大
半退遁正月初三初四等日參將石玉龍等在
萬級嶺一帶疊次接仗斃賊尤多查青弋江乃
宣城南陵涇縣三邑通路賊所必爭我軍旣扼
要衝更宜嚴密防範鄭魁士已將寒亭之軍移
紮通濟橋與青弋江對峙聲勢更爲聯絡從此

聞

兩路會擊南陵之圍可期速解卽灣黃之賊亦可漸期蕩平奏入報

欽定剿平粵匪方略卷二百十三 己未年

正月二十六日 酉 丁曾國藩奏言 臣接奉

諭旨飭令通籌全局 臣才識短淺何足以言規畫就近

處數省而論則安徽軍務最爲喫重江西次之
福建又次之皖南中界一山皖北中隔一湖兩
路賊勢 臣前疏已詳晰具奏近聞福建之賊尙
踞連城江西之賊竄入南安贛州戒嚴定南崇

義相繼失守以臣愚見連城之賊聞省兵力應
足了之南贛之賊人數尙多悍者較少非一支
客軍所能猝辦必須本省兵力輔以團練方可
徐起有功惟安徽賊黨其氛甚惡其患方長大
凡官軍與賊彼此互爲消長斷無中立之理我
能進而勦賊則賊將竭力禦我不暇他竄我不
能進而勦賊則賊將乘隙犯我旁出四溢皖南

無進剿之師則賊必東犯浙江皖北無進剿之
師則賊必北犯齊豫故就一隅觀之則江西之
南贛福建之連城均是賊黨均須兵力不可舍
近而圖遠就全局觀之則兩利相形取其重兩
害相形取其輕又不得不舍小而圖大誠使大
江兩岸各置重兵水陸三路鼓行東下剿皖南
則可分金陵之賊勢即可紓浙江之隱憂剿皖

北則可分廬州之賊勢卽可紓山東河南之隱憂方今湖北全省肅清然與皖境處處緊接防不勝防者莫如湖北據上游之勢能制皖賊之死命者亦莫如湖北臣與官文胡林翼等熟商就現在之兵力稍加恢廓北岸須添足馬步三萬人都興阿李續宜鮑超等任之中流現有水師萬餘人楊載福彭玉麟任之南岸須添足馬

步二萬人臣
率蕭啟江張運蘭等任之三道並
進夾江而下幸而得手進占十里則賊蹙十里
之勢進占百里則賊少百里之糧卽不甚得手
而上游之勢旣重卽下游之賊不得不以全力
禦我其於金陵廬州兩大營均有裨益此遵

旨通籌全局宜併力大江兩岸之微意也至臣處近日
軍情蕭啟江一軍自拔營南赴雩都據稟南贛

各屬賊蹤蔓延力難兼顧臣飭令專救贛州以保要郡不必旁顧他處張運蘭一軍自十二月十七日馳抵景德鎮十九日吳國佑小挫一次二十七日張運蘭大勝一次贛州居江西之極南景德鎮居江西之極北相距千餘里臣駐建昌距兩軍各五百里調度不靈轉運不便且兩處皆孤軍深入賊衆兵單日夜焦思無師可濟

臣前摺聲明蕭啟江之軍或留防南路或隨臣北行容俟續行具奏近日詳加體察顧此則失彼顧南則失北與其懸心兩地不若專力一方已咨商江西撫臣耆齡請其另調勁軍以勦南顧兼辦團練以散脅從臣卽專辦北路調回蕭啟江一軍歸併饒州彭湖等處在江西則臣管北邊耆齡管南邊在皖楚則臣攻南岸都興阿

等攻北岸地有分防斯責無旁貸師有定向斯
士無二心免致到處牽掣一無所成此臣處近
日軍情擬調蕭啟江併赴北路之微意也臣往
歲在軍未聞賊匪能用馬隊近聞粵匪嘗以馬
隊衝鋒擒匪則邊馬尤多李續賓三河之敗卽
係賊馬數千爲湘軍向來所未見昨吳國佑景
德鎮之挫亦爲賊馬所困今欲整頓陸軍不得

不添設馬隊東三省馬隊爲天下勁旅根本所
在不敢多爲奏調臣與湖北督撫函商擬由官
文等奏調察哈爾馬三千匹請

旨飭上駟院押解來南潁亳一帶
有善騎之勇可募名曰馬勇應卽添練新馬隊二千餘騎與都興阿
之舊隊相輔而行於九江湖口等處擇平原曠
野馳騁而操習之惟以南人而騎北馬以勇丁

而學弓箭非倉卒所能奏效臣願竭數月之力朝夕講求從容訓練期於成熟而止練成之後以二千匹分江北隸都興阿舒保等麾下以五百匹分江南隸臣麾下以壯步軍之氣而寒賊黨之膽餘賸馬匹游牧於黃州鞍轡等具設局於九江以備隨時添補更換之用仰仗

皇上威福茲事若成皖豫等省軍務可期大有起色此

添置馬隊臣願自任教練之微意也溯自咸豐六年洪楊內亂河北肅清武漢再克臣方慶幸以爲大難計日可平不謂遷延歲月粵匪未靖擒匪復滋餉項有日竭不支之勢將士有久疲思退之心不得不改絃更張亟思所以振之也奏入

上命軍機大臣傳諭曾國藩曰安徽賊氛甚惡湖北據

皖境上游該侍郎統籌全局意在併力大江兩岸爲節節進剿之計所見甚是惟現在江西南贛等處賊氛尙熾該侍郎未能卽日北行俟南路稍鬆再赴皖楚交界籌辦大局其調察哈爾馬匹一節上年調赴袁甲三等軍營之馬沿途倒斃十之七八一路解費概屬虛糜翁同書因廬營缺馬曾有就地採買之請較之遠路調撥似有實濟本日已諭知官文等設法

籌辦矣將來楚軍東下如馬隊不敷並可由勝保等
軍營酌量協撥

上又命軍機大臣傳諭官文都興阿胡林翼曰曾國藩
奏通籌全局須添練馬隊據稱現在賊勢以安徽爲
最重能據其上游而制其死命莫如湖北曾與官文
等籌商北岸添馬步三萬人以都興阿等領其軍中
流水師楊載福等任之南岸亦須添馬步二萬人該

侍郎自率蕭啟江張運蘭等前往統領爲三道並進
夾江東下之舉惟蕭啟江赴援贛州張運蘭專勦景
德鎮兩軍皆距曾國藩軍營甚遠擬商耆齡另調勁
軍以勦南贛該侍郎卽專辦北路調回蕭啟江歸併
饒州彭湖等處商由官文等奏調察哈爾馬三千匹
以備募練馬勇所議軍情均合時勢惟江西現無兵
力可與蕭啟江抽換曾國藩仍須暫留建昌防勦南

路俟賊勢稍鬆再赴江西北境察哈爾馬匹本屬無
多節次調往勝保袁甲三軍營沿途倒斃十之七八
徒滋糜費不如仍由湖北採買較爲便捷近年粵捻
各匪多用馬賊衝鋒官軍自應添備騎兵與步兵相
輔而行前此湖北練習馬隊已有成效自可擴充辦
理將來楚軍東下如馬隊不敷並可由勝保等軍營
酌量協撥

曾國藩又奏言臣前咨商耆齡撥兵來建昌換防頃准覆函以贛南方棘無兵可撥囑臣暫駐建昌兼防閩賊內竄等語查南路防剿喫緊而連城一股經閩兵阻截難保不回竄江西且臣拔營北行去蕭啟江一軍愈遠聲息難通目下有不能遽行移營之勢自應暫留建昌相機辦理再查建昌甯都各屬別無防兵江閩交界千

里空虛賴南鎮總兵饒廷選帶兵在閩前因患病未痊經督臣王懿德另派豫祺接統連城諸軍入春以來饒廷選病體當已漸愈該總兵係江省地方官曾奉

旨歸臣調度前守廣信衢州著有成效仰懇

天恩飭令饒廷選酌帶所部前來江西或駐紮甯都建昌或卽赴贛州本任應俟臨時酌奪如蒙

飭調則南路邊陲有備兼可爲閩境聲援奏入

上命軍機大臣傳諭王懿德曰江西南路防勦喫緊贛南一帶無兵可撥贛南鎮總兵饒廷選現在革職留營在閩患病並未帶兵出勦閩省州縣惟連城未復不難剋日殲平該總兵患病諒已就痊著王懿德卽飭酌帶所部兵勇馳赴江西會國藩軍營聽候調度毋稍遲延

曾國藩又奏言據李續宜稟稱李續賓遵

旨進攻廬州因三河鎮爲舒廬衝要賊築僞城一座堅
壘九座九月二十八日進紮三河十月初二日
親攻九壘下之適粵逆陳玉城捻逆張落刑各
率大股來援賊衆十餘萬連營數十里抄大軍
後路李續賓所部除留防九江及舒桐外隨征
不過五千餘人又攻壘血戰銳卒損傷過多遂

飛調防兵策應未及至而賊已來徧初十日派
隊迎擊金牛鎮戰於樊家渡已獲全勝忽左路
出賊數萬乘霧來抄我軍回戈返鬪前後受敵
參將彭友勝遊擊胡廷槐饒萬福力戰死之餘
皆截阻不能歸營李續賓自領親兵救應而僞
城之賊復出與援賊相合我軍四面被圍初更
時最後兩營李續燾彭祥瑞越壘衝山於是賊

踞其壘斷我軍去路或勸以突圍退保無難再
振李續賓誓不生還二鼓向盡怒馬直出赴悍
賊林立處死之臣胞弟曾國華及何忠駿何裕
王揆一李續藝吳立蓉萬斛源等皆死之而副
將李存漢道員孫守信運同丁銳義等猶督守
孤壘以俟桐城援兵至十三日夜子藥水米俱
盡孫守信等死之十九日賊攻桐城李存漢趙

有材謝嗣湘李景均等死之桐城復陷凡湘軍
員弁兵役隨李續賓死者近六千人十一月三
河附近紳民從賊中覓得李續賓忠骸潛送霍
山迎至黃州卽將返葬湘鄉各等情臣查李續
賓戰績自咸豐三年赴援江西克復太和安福
永興四五兩年攻克岳州武漢廣信等處六七
八等年攻克武漢九江皖北各處此次死事之

烈官文等必詳奏請卹惟臣與李續賓從事較久相知頗深有不得不瀆陳於

聖主之前者李續賓初援江西嗣隨羅澤南征剿各處循循若無所知逮岳州大橋之戰塔齊布獨稱湘勇白旗爲無敵賊亦深畏白旗白旗者李續賓所部右營也旣而田家鎮之役以少勝衆九江之敗士卒多逃散獨右營勇丁依依不去然

後衆稱其賢能得士心矣猶復粥粥無能轉戰
江西岳鄂之間經過州縣不見一客耦人廣坐
不發一語自楚軍之興人人皆以節烈相高慷
慨陳詞豫相要約李續賓獨默然深藏初不豫
作激烈自許之言然忠果之色見於眉宇閒遠
近上下皆有以信其大節之不苟臣所立湘勇
營制編隊立哨略倣古法計事授精皆有定程

行之既久各營時有變更惟李續賓守法五年
始終不變嘗謂臣曰立法者但求大段妥善行
法者當於小處彌縫臣初定湘營餉項稍示優
裕原冀月有贏餘以養將領之廉而作軍士之
氣李續賓統營既多歷年已久節省贏餘及廉
俸至數萬金不寄家以自肥概留備軍中非常
之需咸豐六年冬曾寄銀五千兩於南昌濟臣

糧臺之急七年冬又寄銀萬兩至吉安濟臣弟
曾國荃一軍又寄三千兩至貴溪濟李元度一
軍此外贏餘銀兩亦皆量力濟人不忍他軍飢
而已軍獨飽往者故撫臣江忠源嘗論兵勇利
病勇則畛域不分而患其蹤跡無定此之所革
彼之所收兵則名籍有定而患其界限太分勝
不相讓敗不相救兵則規矩較肅而患無陷陣

剛猛之風勇則銳氣較新而患無上下等威之
辨故用兵以和爲貴用勇以嚴爲貴李續賓取
下極寬終年不見愠色而弁勇有罪往往揮涕
而手刃之甲寅十月在田家鎮斬退怯之勇臣
奏牘稱其有名將之風故刑人無多而歲久無
敢弛慢至於臨陣之際專以救敗爲務以顧全
大局爲先遇賊則讓人禦其弱者而自當其悍

者分兵則以强者予人而攜弱者以自隨或攜
隨數次弱者漸强矣則又另帶新營以自隨江
楚諸軍每言肯攜帶弱兵肯臨陣救人者前惟
塔齊布後惟李續賓此次三河之敗未始不由
乎此此軍民所尤感泣不忘者也 臣昔觀李續
賓厚重少文百戰無挫私心慰幸以爲可躋
中興福將之列不意大難未平長城遽隕督臣官

文等具奏請卹諡蒙

聖慈矜鑒臣與李續賓同縣姻戚不敢飾辭溢美亦不敢沒其忠勳謹就夙昔所知瀆陳

宸聽伏乞

飭付史館採入列傳奏入

上諭內閣曰巡撫銜浙江布政使李續賓前在三河鎮剿賊陣亡業經降旨優加褒卹茲據曾國藩臚陳該

員功績具奏覽之益深悼惜李續賓從軍數載所向成功及其見危授命麾下將士無一偷生實有古名將風允宜垂諸信史百世流芳著將會國藩此奏交國史館採入列傳以示褒嘉

曾國藩又奏言接各路函稟三河營壘於十月初十日被圍是夜李續賓怒馬赴敵死之臣弟曾國華義不獨生亦衝騎赴賊中死之幕中諸

友如何忠駿等同時並殉惟孫守信復堅守兩
日至十三夜乃從容就義等情溯查咸豐五年
十月逆賊石達開率衆竄入江西勾結廣東匪
徒周培春等連陷瑞臨袁州三府六年春又陷
吉安撫建三府臣所部諸軍羅澤南旣先赴湖
北周鳳山又敗於樟樹鎮臣不得已率水師赴
援省城而令李元度陸軍進攻撫州維時人心

震驚道路梗阻臣幾有岌岌坐困之勢臣弟曾國華馳赴武昌乞師以救江西經胡林翼奏委國華統領普承堯吳坤修劉騰鴻各軍赴援遂由咸甯蒲圻沿途迎勦取道萬載攻克新昌上高兩月之間連復六縣遂圍瑞州由是江西湖南始通音問而國華積勞致疾就醫南昌與臣握手相見悲喜交集蓋以新募之衆千里來援

節節攻勦摧江西十餘萬之賊鏖戰於酷暑烈日之中艱險備嘗乃有此兄弟會晤之一日也病痊仍回瑞州督勦七年正月臣赴瑞州與國華定計合圍掘長濠三十里斷賊接濟二月丁父憂兄弟奔喪回籍厥後瑞城克復尙未變國華原定規模臣叔父曾驥雲無子以國華爲嗣八年二月降服期滿四月李續賓調赴湖北奏

明留營幫辦相與講求戎政晨夕商酌國華性
好讀史頗懷大志於古人艱危之境反復推究
其得失平昔持論過高臣恆誠之近日議論軍
事漸歸於精細穩實與李續賓兄弟意見多合
十月初九日猶以家書寄臣稱援賊屬至各營
意欲退保國華與主帥堅持不退二人謀合必
不爲衆說所搖等語豈料其發信之次日卽爲

效命之秋而其堅持不搖之計卽爲全軍俱殉
之機也七年五月間欽奉

恩諭有曾國華帶勇援應一門忠義實深嘉尚之褒跪
讀之下感激涕零今幸臨危不苟仰副

聖慈捐糜以報

生成之德在門戶亦足增榮子弟得附忠義之林在臣
心更復何憾特以臣叔父年齒日高倚閭望切

孤姪曾紀壽幼穉何依臣六載軍中愆尤叢集
卽手足私愛亦覺愧負良多建昌去舒城千有
餘里兵力不能遽及山川間隔日月寢淹骸骨
未收遺憾難雪追思昔年若無國華援應臣無
以至今日臣軍無以圖倖全卽江西亦無以轉
危爲安憫念微勞不忍不瀆陳於

聖主之前至於例得卹典應由湖北督撫彙案具奏臣

不敢妄爲乞

恩奏八

上諭內閣曰候選同知曾國華在三河鎮殉難當經降
旨追贈道員從優議卹該故員歷著戰功一門忠義
著再加恩賞給伊父曾驥雲從二品封典以示褒嘉
同日勝保翁同書奏言臣等接據總兵吉順函
稱訊據民人闕廣和自店埠逃出供稱粵逆近

因大江阻塞迫令民間派夫挑運糧米自梁山至九洑洲送入金陵數月以來絡繹不絕現復令僞旅帥出夫於烏江開挖新河直抵江浦以便往來遂得橫行無忌等語查臣等祇能由北而南逐節進擣其烏江江浦一帶非皖營兵力所能及自應由和春德興阿就近設法派兵嚴行堵截以期斷賊糧道奏入

上命軍機大臣傳諭德興阿鞠殿華毛三元曰勝保翁
同書奏粵逆因大江阻塞迫令民間挑運糧米由梁山至九洲送入金陵復令僞旅帥出夫於烏江開
挖新河直抵江浦以便往來等情逆匪久踞金陵未
能攻克總因賊糧未斷現在勝保駐紮鳳陽距烏江
江浦等處較遠著德興阿等就近派兵於九洲地
方嚴行堵截斷賊糧道毋令接濟金陵並撥兵於烏

江一帶實力堵禦毋令逆匪開挖新河橫行無忌如江北兵力一時未能兼顧卽著咨商和春酌派勁兵分投堵截毋稍遲延

二十七日

戊戌

胡興仁奏言婺源賊匪恃其西通

景德鎮互爲聲援並有奸民貿易以至久攻未下副將李嘉萬探知婺源城西南之寅川鋪爲奸民接濟賊糧淵藪於十二月初八日派隊馳抵

該處衙枚疾進該逆守卡者約二百餘名遙見我軍驚惶失措與奸民等四竄上山該副將卽率馬步隊跟蹤前進勦殺數十名生擒十餘名當將寅川鋪奸民貨物及僞衙所藏硝磺火藥十餘處燒燬其婺城之東北兩面自江長貴接統婺防後訪知賊之輜重半在高沙於初十日令署婺源縣朱德汾署守備陳啟熊等率領兵

勇隨參將王恩榮進攻高沙復令遊擊王夢麟
等帶隊埋伏江長貴親帶小隊督勦江長泰帶
領奮勇首先衝入賊巢賊衆蟻擁而出不下萬
衆我軍伏兵齊起陣斬黃衣賊目五名楊名聲
復斬龍旗悍賊一名逆賊大敗回城落河死者
不計其數十七日江長貴又分派各隊會合李
嘉萬進擊高沙轟斃紅衣賊目二名黃衣賊目

一名並以火器焚其望樓城中之賊見我軍面
面偪圍不敢過河但於隔岸山梁搖旗吶喊有
張蓋黃傘賊目親自指揮我軍對準黃傘密燃
大礮但見該逆旗幟披靡羣然闕散二十二日
江長貴復帶隊誘敵兼勘地勢以圖進偪行近
城濠突有賊乘礮船渡河該署鎮揮擊落水淹
斃甚多自是該逆堅閉不出查婺城之賊經我

軍疊次攻勦賊膽已寒惟逆情叵測且與景德
鎮之賊互相援應非四面攻圍終虞日久竄突
現據李定太函稱擬將衢防並開化大鏞嶺等
隘口布置周妥後卽於正月十一日移紮白沙
督軍會剿如能四面夾擊當可聚殲奏入報